

**Parlimen: Perbahasan Projek Lynas Ibarat Perdebatan Sainifik
Bernama
19 Jun, 2012**

KUALA LUMPUR, 19 Jun (Bernama) -- Perbahasan mengenai Projek Loji Bahan-Bahan Maju Lynas (LAMP) pada persidangan Dewan Rakyat Selasa menyaksikan kedua-dua anggota penyokong kerajaan dan pembangkang berusaha mempertahankan hujah masing-masing berasaskan fakta saintifik serta kepentingan politik masing-masing.

Perbahasan hangat sejurus pembentangan laporan oleh Pengerusi Jawatankuasa Pilihan Khas (PSC) Mengenai Projek LAMP Datuk Seri Mohamed Khaled Nordin sentiasa tegang dengan pencelahan demi pencelahan serta pertikaman lidah antara satu sama lain berkaitan hujah yang dikemukakan.

Anggota penyokong kerajaan berpendapat pembangkang seharusnya merujuk kepada syor yang dikemukakan PSC hasil penemuan pakar perubatan, sains nuklear, pertubuhan profesional berhubung Projek LAMP, dan bukannya menidakkan laporan itu.

Rata-Rata anggota pembangkang pula mempertikai penemuan laporan jawatankuasa itu yang menyatakan tidak ada perkaitan dedahan sinaran yang berlaku di kilang Asian Rare Earth (ARE) di Bukit Merah dengan projek LAMP sehingga menjejaskan tahap kesihatan awam, aspek keselamatan dedahan sinaran dan membangkitkan isu pengurusan sisa serta residu projek itu.

Khairy Jamaluddin (BN-Rembau) berkata terdapat banyak perbezaan antara isu kilang ARE dengan projek LAMP daripada segi penggunaan teknologi, dan perkara itu perlu didedahkan kepada masyarakat menerusi lebih banyak penglibatan awam.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=674202>